



**PERUTUSAN  
NIK NAZMI NIK AHMAD  
MENTERI SUMBER ASLI DAN KELESTARIAN ALAM**

**SEMPENA HARI BUMI 2024**

**22 APRIL 2024**

---

Saya ingin mengambil kesempatan ini untuk mengucapkan Selamat Menyambut Hari Bumi yang disambut pada 22 April 2024. Sambutan Hari Bumi adalah sambutan tahunan di seluruh dunia yang telah disertai oleh 193 buah negara dan disambut pada setiap tahun. Sambutan ini adalah bertujuan menunjukkan sokongan setiap individu dan negara terhadap usaha-usaha dalam melestarikan alam sekitar.

Tema Hari Bumi pada tahun ini adalah *Planet vs. Plastics* yang membawa mesej yang jelas berhubung tanggungjawab kita dalam memulihara dan memelihara bumi yang kita warisi ini. Seperti yang telah diketahui umum, sisa plastik memerlukan sekurang-kurangnya 500 tahun untuk diuraikan semula jadi. Perkara ini tidak boleh dipandang enteng dan memerlukan kerjasama semua pihak di dalam menguruskan dan seterusnya menangani pencemaran plastik.

Saya telah mengarahkan agar undang-undang yang mengawal pencemaran plastik disemak semula untuk mengukuhkan langkah-langkah menangani pencemaran plastik.

Selaras dengan agenda kelestarian alam, kerajaan mempunyai Pelan Hala Tuju Kelestarian Plastik Malaysia (2021-2030) dan Pelan Hala Tuju Malaysia Ke Arah Sifar Penggunaan Plastik Sekali Guna (2018-2030) serta sedang mengusahakan dasar kebangsaan mengenai pengeluaran, penggunaan dan sisa plastik yang akan selaras dengan Perjanjian Plastik Global (GPT) yang masih dalam proses rundingan.

Malaysia setakat ini telah mengambil bahagian dalam empat (4) pusingan rundingan antarabangsa mengenai GPT di Jawatankuasa Rundingan Antara Kerajaan untuk Membangunkan Instrumen Antarabangsa Yang Mengikat Secara Sah mengenai Pencemaran Plastik, Termasuk dalam Alam Sekitar Marin (INC). Kementerian Sumber Asli dan Kelestarian Alam (NRES) juga sedang mengetuai delegasi Malaysia ke siri rundingan INC ke-4 (INC-4) bermula esok 23 hingga 29 April 2024 di Ottawa, Kanada.

Pelbagai usaha boleh dilakukan oleh semua pihak terutamanya orang awam seperti membudayakan penggunaan beg kitar semula dan menghindari penggunaan plastik sekali guna. Saya berharap agar usaha-usaha hebahan dan promosi berkaitan kelestarian alam sekitar dan kempen hindari penggunaan plastik sekali guna dapat terus dipertingkatkan bagi memupuk semangat cintakan alam sekitar dan seterusnya menjadi amalan dan budaya gaya hidup lestari dalam kalangan masyarakat.

**Selamat Menyambut Hari Bumi 2024!**

**NIK NAZMI NIK AHMAD  
MENTERI SUMBER ASLI DAN KELESTARIAN ALAM  
22 APRIL 2024**